

# HINBAADHU!!!

Hinbaadhu maqaa Oromaa kankoo miti durattuu  
Wanti aadaakoon alaa qileetti haadarbatamtuu

Maqaan abbootiikootii kan duudhaakoo ganamaa  
Yoon gulummeeffadhe maaliif narraa jibbamaa?

Fayyiseefi fayyisaan maqichi kabajamaa  
Adaaneef Adaanechiin maaliif bakka buufamaa?

Daraaraafi Daraatuun maqaa keenya mitiiree?  
'Abbebeefi Abebaayee' hidhaa maalii nutti hidhee?

Waaqumaan maal taanaani 'Gabreigzaaber' jedhame  
Dhiibbaan fedhaatiin alaa nurratti maa fe'ame

Cunqursaa darbe sana isa bara Nafxanyaa  
Tokkummaan walii gallaan ofirraa achi darbanna

Mammaaksasaan Oromoon yommutti dhugeeffatuu  
Maqaa gabaa keessatti badde gabumatti deeffatu

Maqaa keessaan ibsamaa eenyummaan saba tokkoo  
Ta'uu baannaan jireenyi walakkaadha gartokkoo

Guutuu ta'uuf akkasii maqaadhaan boona sabni  
Ta'uu baannaan garbadha kan dhiitani bulchani

Warri of ta'uu dadhabee yeroo hundaa sossodaatu  
Halagaan itti kolfa firris iddoo isaa hinlaatu

Kanaafuu hinta'u lakkii maqumti abashootaa  
Kan Isiraa'elis ta'ee hinfenu Arabootaa

Yoo gama Sanyiin ta'e nuti Oromoo mitiiree?  
Maqaa maaf ergifanna keenya isaanii gadiiree?

Kemaal Jemaal maaliifi Caalchisaan maal ta'eetu  
Oromiyaan maal taanaan maqadhaan gama ceetuu

Isiraa'eel Yaa'iqoob maal maqaan Ibirootaa  
Nutu Oromoodha malee mitiimi Isiraa'elootaa

Dibooraafi Asteeriin hinbeeku sanyiin keenyaa  
Laliseef Boontuu qabnaa maal barbaacha achi deemnaa

Zaliiqaafi Jamilaan lakkisaa keenya miti  
Achuma nuuf deebisaa haadeebi'uu gamatti

'Bellexee Belexechii' kun ammoo eessaa ba'ee  
Caalaaf Caaltuun maal taanaan akka kana doofa'ee

'Gebre Maariyaam, Gabre Kiristoos' Walatta maaryaami'  
Kun martuu nunlaallatu dafaa dachaasaa lammii

Nutisoo maqaa qabnaa maqaa gurratti tolu  
Aadaa sabichaa ibsuuf hundumtuu wal hincaalu

Gaaf tokko Waraabuutu akkas jedhee dubbate  
Kan garaa malee maqaa, akka hindhibnee hubatee

Garaasaaf kan bitamu waraabuun okkolaani  
Kan maqaa giroo hinqabu raqasaa argannaani

Ilmi namaa akkas miti sammuu ittiin yaadu qaba  
Xiinxalee buusee baasee nilaata murtii jabaa

Maqaa baduu mannaa mataa dhabuu wayyaa  
Inni kan keenya hintaane boolla haabu'u hallayyaa

Maqaan Oromoodhaafii haaloo baafannaa miti  
'Gizaachew 'Adifires' homaa nuttii hinqabuuti

Oromoon maqaasaatiin hawwii qabu ibsata  
Sirna aammachiisaa qaba aadaasaa kunuunfata

Malee Oromokoo durii gabroomee hinjiraanne  
Eenyuummaaf sabboonummaa abashootaaf hinlaanne

Oromoon har'a jiru akkas jechuudha qabna  
Maqaa nu hinilaallanne ofirraa kunnee ganna

Maafan baadha itti eelee maqaa nan ilaalanne  
Hundeef sanyiikoo faana isa wal hinsimanne

Maaf jedhanii nawaamuu Misgaanuufi Taaddasaa  
Maaliif narratti jibbu Beekaniifi Fayyisaa

Maal ta'e maqaan kankoo maqaan hundee ganamaa  
Maafan wajjin siqiqa kan ormaatiif naagama

Tarfaasafi Araarsaan maal ta'e yaa jarakoo  
Laliseefi Hanbiseen keenya mitimoo obbookoo

Maarree maaltu taanaani heerri ganamaa maqe  
Diinni karuma kamiin sum'iisaa nutti naqe?

Kan qabnu cimaa ture sirna Gadaa guddichaa  
Kan keessaa burqee hindhumne falaasamni sabichaa

Maaltu dhufnaan ergisaaf kan ormaa laaqaa turre  
Gowwoomsaan jaarraa olii ammammoo nun ga'uuree?

Booranaaf warri Gujii warri Raayyaaf Kamisee  
Daguuggaa sum'ii jaraa maaltu isinitti hambisee

Warri Maccaaf Tuulamaa Warra Baaleef Harargee  
Ormi maqaaf duudhaasaa maaliif sinirra naqee?

Jimmaaf Iluu Abbaa Booraa warri Leeqaa Naqamtee  
Amboon biyya goototaa Ormi akkamiin sin laaqxee?

Warri Arsiif Harargee lammiinkoo Shaashamannee  
Maqaa warra Yooqixaan maaliif ofirraa hinkaasnee?

Ijoolleen Dambiidoolloo, Begii Qarqara lafaa  
Ijoolleen Gimbi keenyaa Nafxanyaan maa sibalfaa?

Sabboontota Adaamaa Bishooftuuf laga Xaafoo  
Yaa Ijoollee Gullallee warreen hinqabne laafoo

Uummanni Oromookootii guutummaan biyya lafaa  
Harcaatuun maqaa Ormaa maalumaafuu nutti hafaa?

Sanyiin sanyiiwwan keenyaa waan gaarii dhaaluu qabu  
Sanyiin gosa addaaddaa maalumaafuu walmakuu

Maqaan keenya boonsaadhaa, aadaan keenyas akkasi  
Gonkumaa hin ergifannuu hiree qabnaam nutisii

Maqaa ormaa akka hinbaanne waadaa waliif haaseennu  
Utuu hundumaa qabnuu gola Ormaa dhaquu hinqabnuu

Maqaan Ormaa ormuma kanaaf ofirraa gataa  
Kunumtuu salphaa miti qabsoo keenya achi buta

Hinjedhiin maaloo adaraa maqaan ayyaana hintaatuu  
Maqaan maquma naafi hiika biraa naan laatuu

Hinjedhiin adarakee kun jaamummaa guddaadha  
Har'a ofirraa gatanii isa darbeef gaabbuudha

Taaddasaa Birruufaa Maammoo Mazammirii  
Oromoof qabsaa'anii yoom jijjiiratanii

Akkas jetta taanaanii ati waa tokko beeki  
Har'iifi yeros gargar mee ta'uusaa naa qeeqii

Haalli ammaaf yeroosii waldorgomaaree dhiiroo  
Warra baay'ee baratan kumootaan qabna qeerroo

Dalaganii darbaniim isaanis akka dansaa  
Nurratti lakkisaniimaanaa gurguddaasaa

Nutuu bu'aa isaaniitii ijoolleen ammaa kunii  
Afaan keenyaan dubbannee barreessuu danda'uunii

Maqaa ofiin of ta'uun innumtuu qabsoo guddaa  
Maqaan waan hinduuneefuu jiraata bara hundaa

Kanaaf lammiinkoo hunduu dammaqaa waldammaqsaa  
Maqaa ergisaa sanaa ofirraa achi calaasaa

Gaaf tokko gadi taa'een wanta tokko yaadadhe  
Jechoota afaan keenyaa yaadaan taa'een lakkaa'ee

Akka cirracha abbayyaa baay'achuunsaa nadhibee  
Xiinxalee buusee baaseen garuu waa tokkon gaabbe

Maqaan jecha erga ta'ee jechi afaan guddisaa  
Warreen maqaan abashaa maaf afaankoo quucarsaa

Miliyoona hedduutoo maqaa abashaan waamamaa  
Jechoonni Afaan Oromoo karaa kam dagaagfamaa

Yoos diinni Afaan Oromoo ammas Oromoodhakaa  
Halagaa miidhee jedhee maafan quba itti qabaa?

Garuu abdiin amma jiru ifaadha fuuldurrisaa  
Dhaloonni qubee kuni hubateera hundasaa

egaa...

An karaakoo jedheera hinbaadhu maqaa Ormaa  
Har'as ta'ee boriyyuu ani ittumaanaan mormaa

Atis hinbaatiin lakkii sitti haahafu gonkumaa  
Kaabas taanu kibbaanis nuti martuu tokkumaa

Hinbaannu waaroo halagaa isa barri itti darbe  
Eenyummaa boonsaa qabna gaabbineerra kan darbe..

\*\*\*\*//\*\*\*\*

**©BEEKAN GULUMA ERENA, 2016**